

Toshkent davlat iqtisodiyot universitetini tamomlagan Qozog‘iston Respublikasi fuqarosi Qoplonov 2020-yil 21-fevral kuni O‘zbekiston Respublikasi Adliya vazirligi huzuridagi Intellektual mulk agentligiga patent vakili sifatida attestatsiya va ro‘yxatdan o‘tish uchun murojaat qildi.

Agentlik tomonidan Qoplonovning murojaati rad etildi va bu haqida 2020-yil 5-mart kuni tegishli yozma bildirishnoma yuborildi. Rad etish asosi sifatida Qoplonovning arizasi rus tilida taqdim qilinganligi, Qoplonov O‘zbekiston Respublikasi fuqarosi emasligi hamda nomzod oliy yuridik ma’lumotga ega emasligi sabab sifatida ko‘rsatildi. Mazkur holat yuzasidan Qoplonov Agentlikka nisbatan o‘z e’tirozida o‘rta-maxsus yuridik ma’lumotga hamda Qozog‘iston Respublikasida advokat yordamchisi sifatida besh yil ish stajiga ega ekanligini ko‘rsatib o‘tdi.

Kazus bo‘yicha savollar:

Ilmiy-nazariy adabiyotlar, olimlar fikri hamda xalqaro huquq normalari va milliy qonunchilik asosida patent vakili institutiga ta’rif bering.

Vaziyatga huquqiy baho bering.

Qoplonovning arizasi qanoatlantirilishi kerakmi?

Qoplonov nomidan sudga ariza namunasini tayyorlang.

Mazkur kazusga huquqiy baho berish uchun, muammoli vaziyatlarni aniqlab olishimiz hamda ularni huquqiy tahlil qilishimiz lozim bo‘ladi. Bu uchun yuqoridagi vazifalarni keltirib o‘tish joiz. Unda quyidagilar so‘ralgan:

Birinchidan, ilmiy-nazariy adabiyotlar, olimlar fikri hamda xalqaro huquq normalari va milliy qonunchilik asosida patent vakili institutiga ta’rif berish;

Ikkinchidan, Qoplonovning arizasi qanoatlantirilishi kerak yoki kerak emasligini aniqlash;

Uchinchidan, Qoplonov nomidan sudga ariza namunasini tayyorlash va boshqalar.

Mazkur vazifalarga javob berish davomida quyidagi holatlarni ham tahlil qilib o‘tish maqsadga muvofiq.

- patent vakili sifatida attestatsiya va ro‘yxatdan o‘tkazish uchun murojaat qilish tartibi;
- patent vakiliga qo‘yiladigan talablarning milliy va xalqaro tartibi;
- murojaat rad etilganligi to‘g‘risidagi yozma bildirishnomaning oradan o‘n to‘rt kun o‘tib, ya’ni 5-mart kuni jo‘natilishi;
- rad etish asosi sifatida Qoplonovning arizasi rus tilida taqdim qilinganligi, Qoplonov O‘zbekiston Respublikasi fuqarosi emasligi hamda nomzod oliy yuridik ma’lumotga ega emasligi sabab sifatida ko‘rsatilishi va boshqalar.

Muammoli vaziyatga huquqiy javob berish uchun uning huquqiy asoslarini aniqlash imkonini beruvchi normativ-huquqiy hujjatlar ro‘yxatini keltirib o‘tish maqsadga muvofiq. Bu uchun O‘zbekiston Respublikasining yangi tahrirdagi “Ixtirolar, foydali modellar va sanoat namunalari to‘g‘risida” 2002-yil 29-avgustdagi 397-II-sonli Qonuni, Vazirlar Mahkamasining “Patent vakillari to‘g‘risidagi nizomni tasdiqlash haqida” 2003-yil 1-iyuldagi 298-sonli qarori asosida tasdiqlangan Patent vakillari to‘g‘risidagi Nizom, O‘zbekiston Respublikasi Adliya vazirining “Patent vakilligiga nomzodlarni attestatsiyadan va ro‘yxatdan o‘tkazish hamda patent vakillarini attestatsiyadan o‘tkazish qoidalarini tasdiqlash haqida” 2019-yil 13-dekabrdagi 538-mh-sonli buyrug‘i asosida tasdiqlangan Patent

vakilligiga nomzodlarni attestatsiyadan va ro'yxatdan o'tkazish hamda patent vakillarini attestatsiyadan o'tkazish qoidalari kerak bo'ladi.

Muammoli vaziyatning huquqiy tahliliga o'tishdan avval patent vakili instituti xususida huquqiy va nazariy ma'lumotlarni tahlil qilsak. Patent vakili tushunchasiga huquqiy ta'rif O'zbekiston Respublikasi Vazirlar Mahkamasining 2003-yil 1-iyuldagi 298-sonli qarori asosida tasdiqlangan Patent vakillari to'g'risidagi Nizom 2-bandida keltirilgan bo'lib, yuridik yoki jismoniy shaxslar nomidan O'zbekiston Respublikasi Adliya vazirligi huzuridagi Intellektual mulk agentligi hamda boshqa tashkilotlar oldida intellektual mulk obyektlariga huquqiy muhofaza olish va uni amalga oshirish masalalari bo'yicha vakillik qilish huquqi berilgan jismoniy shaxs patent vakili deb ataladi. Bundan tashqari, O'zbekiston Respublikasining yangi tahrirdagi "Ixtirolar, foydali modellar va sanoat namunalari to'g'risida" 2002-yil 29-avgustdagi 397-II-sonli Qonuni 35-moddasida sanoat mulki obyektlariga patent olishda patent vakillarining ishtiroki xususida umumiy qoidalar mustahkamlangan. Unda belgilanishicha, patent vakili yuridik va jismoniy shaxslarning Agentlik oldidagi vakillik huquqini amalga oshiradi. O'zbekiston Respublikasi hududida doimiy yashaydigan O'zbekiston fuqarosi patent vakili bo'lishi mumkin. Patent vakillariga qo'yiladigan malaka talablari, ularni attestatsiyadan o'tkazish va ro'yxatga olish tartibi qonun hujjatlari bilan belgilanadi.

Yuridik fanlar nomzodi Davud Davudov o'z ilmiy maqolasida patent vakili tushunchasiga quyidagicha beradi: Patent vakili — mijoz nomidan himoya obyektini aniqlash bilan shug'ullanadigan va yaratilgan obyekt uchun himoya hujjatlarini olish uchun barcha imkoniyatlarni ishga soladigan mutaxassis¹. Mazkur institutni huquqiy tartibga solish uchun Rossiya Federatsiyasida "Patent vakili to'g'risida" 2008-yil 30-dekabrdagi FQ-316-sonli qonun qabul qilingan bo'lib, unda patent vakiliga quyidagicha ta'rif beriladi: Patent vakili — qonunga muvofiq patent vakili maqomini olgan, intellektual faoliyat natijalarini huquqiy himoya qilish va individualizatsiya vositalari, intellektual huquqlarni himoya qilish bilan bog'liq

¹ Институт патентного поверенного в Российской Федерации // Давудов Д., Маренич М. г. Волгоград. 2016. С.2.

faoliyatni amalga oshiradigan fuqarolar. Ular Intellektual mulk huquqi bo'yicha federal ijro etuvchi organ bilan murojaat etuvchilar, huquq egalari va boshqa manfaatdor shaxslar, ya'ni Rossiya Federatsiyasi va chet elda doimiy yashaydigan fuqarolar yoki joylashgan yuridik shaxslar nomidan ish yuritadi, agar Rossiya Federatsiyasining xalqaro shartnomasida yoki Rossiya Federatsiyasi qonunchiligida boshqacha tartib nazarda tutilmagan bo'lsa². Patent vakilligiga nomzod patent vakili sifatida faoliyatni amalga oshirish istagini bildirgan jismoniy shaxs hisoblanadi. Har bir davlatda patent vakili bo'lish uchun turli xil talablar mavjud. Dastlab milliy qonunchilik misolida patent vakili bo'lish uchun talablarni muhokama qilishga harakat qilamiz. VMQ-238-sonli qarori asosida tasdiqlangan Nizomda quyidagi talablar mavjud bo'lib, nomzod:

- O'zbekiston Respublikasi hududida doimiy yashaydigan O'zbekiston Respublikasi fuqarosi bo'lishi;
- oliy ma'lumotga ega bo'lishi;
- intellektual mulk obyektni muhofaza qilish sohasida yoxud intellektual mulk obyektlariga huquqlarni muhofaza qilish sohasida advokat sifatida kamida uch yil ish stajiga ega bo'lishi;
- intellektual mulk obyektlariga huquqlarni himoya va muhofaza qilish bo'yicha faoliyatni amalga oshirish uchun Agentlik tomonidan belgilanadigan hajmda O'zbekiston Respublikasi qonun hujjatlari, O'zbekiston Respublikasining xalqaro shartnomalari sohasida bilimlarga hamda malaka imtihoni natijalari bilan tasdiqlangan tegishli ko'nikmalarga va amaliy qo'llanish tajribasiga ega bo'lishi;
- Agentlik va unga qarashli tashkilotlar xodimi bo'lmasligi.

2019-yil 21-oktabrda Vazirlar Mahkamasining 887-sonli qarori asosida ushbu Nizomga o'zgartirish kiritildi va u qo'shimcha moddalar bilan to'ldirildi. Unga ko'ra:

² Федеральный закон от 30 декабря 2008 г. «О патентных поверенных» // Собрание законодательства Российской Федерации от 5 января 2009 г. № 1 ст. 24.

- Patent vakillarini tayyorlash, qayta tayyorlash va malakasini oshirish yuqori malakali kadrlar tayyorlashni ta'minlash, ularning intellektual mulk obyektlarini huquqiy muhofaza va himoya qilish sohasidagi nazariy va amaliy bilimlarini chuqurlashtirish va yangilash, ular kasbiy tayyorgarligining zamonaviy talablarga muvofiqligini ta'minlash maqsadida amalga oshiriladi.
- Intellektual mulk sohasida mutaxassislarni, shu jumladan, patent vakillarini tayyorlash, ularning bazaviy oliy ma'lumotidan qat'i nazar Toshkent davlat yuridik universitetida magistratura yo'nalishining "Intellektual mulk huquqi" ixtisosligi bo'yicha amalga oshiriladi.
- Intellektual mulk sohasida mutaxassislarni, shu jumladan, patent vakillarini qayta tayyorlash va malakasini oshirish O'zbekiston Respublikasi Adliya vazirligi huzuridagi Yuristlar malakasini oshirish markazi (keyingi o'rinlarda Markaz deb ataladi) tomonidan amalga oshiriladi.

Keyingi vazifamiz patent vakili bo'lish uchun nomzodga qo'yiladigan talablarni muayyan xorijiy davlatlar qonunchiligi misolida ko'rib chiqish. Masalan, Yangi Zelandiya qonunchiligiga ko'ra, patent vakili (patent vakili har xil davlatlarda turlicha aytilishi mumkin, patent advokati yoki patent agenti atamasi ko'proq ishlatiladi) bo'lish uchun nomzodlarga quyidagi talablar qo'yilgan:

- Yangi Zelandiya, Britaniya millatlar hamdo'stligi yoki Irlandiya Respublikasining fuqarosi bo'lishi;
- 21 (yigirma bir) yoshdan katta bo'lishi;
- Yangi Zelandiya qonunchiligi bo'yicha patent vakili imtihonlarini topshirgan bo'lishi;
- yaxshi xulqli bo'lishi;
- kamida uch yil muddat(lar)da Yangi Zelandiyadagi Patent vakili, Patent idorasi yoki deyarli shunga o'xshash amaliy tajribaga ega bo'lgan ishda ishlagan bo'lishi lozim³.

³ "legislation.govt.nz". legislation.govt.nz. 2011-01-01. Retrieved 2012-01-15. Section 100 of the Patent act.

Yangi Zelandiyada patent vakili sifatida ro'yxatdan o'tish keyinchalik Yangi Zelandiya Patent Advokatlari Institutining a'zosi sifatida saylanishiga olib kelishi mumkin. Avstraliya va Yangi Zelandiya o'rtasida imzolangan Tasman kelishuviga ko'ra, Avstraliya patent advokatlari bir paytning o'zida Yangi Zelandiya hududida ham o'z faoliyatini amalga oshirishi mumkin. Ular "Trans-Tasman patent advokatlari", deb nomlanadi⁴.

Huquq oilasi bizga juda yaqin hisoblangan Rossiya qonunchiligida ham patent vakili uchun nomzodlarga bir qancha talablar qo'yiladi. Ushbu talablar "Patent vakili to'g'risida" 2008-yil 30-dekabrdagi FQ-316-sonli qonunida o'z o'rnini topgan. Unga ko'ra, nomzod:

- 18 yoshga to'lgan bo'lishi;
- Rossiya Federatsiyasi hududida doimiy tarzda yashashi;
- oliy ma'lumotga ega bo'lishi;
- mutaxassislik bo'yicha patent vakilligi sohasida hamda ro'yxatdan o'tishni so'rab murojaat qilgan ixtisoslik bo'yicha kamida 4 yillik ish tajribasiga ega bo'lishi kerak bo'ladi⁵.

Rossiya qonunchiligiga ko'ra, patent vakillari instituti bir qancha ixtisosliklarni o'z ichiga olgan bo'lib, ular ixtirolar va foydali modellar, sanoat namunalari, savdo belgilari va xizmat ko'rsatish belgilari, tovarlarning kelib chiqqan joy nomlari, kompyuter dasturlari, EHM, integral mikrosxemalar topologiyalari hisoblanadi⁶.

Keltirilgan ma'lumotlar hamda yuqoridagi normativ-huquqiy hujjatlar asosida navbatdagi vazifani muhokama qilsak. Ya'ni Qoplonovning arizasi qanoatlantirilishi kerakmi yoki yo'q. Mazkur vazifani hal etish davomida bevosita biz ajratib olgan epizodlarni – patent vakili sifatida attestatsiya va ro'yxatdan o'tkazish uchun murojaat qilish tartibi, murojaat rad etilganligi to'g'risidagi yozma bildirishnomaning oradan o'n to'rt kun o'tib, ya'ni 5-mart kuni jo'natilishi va rad

⁴ "Trans-Tasman Patent Attorney Regime". TuckerIPLaw.com. 2014-07-02. Retrieved 2014-07-02.

⁵ Федеральный закон от 30 декабря 2008 г. «О патентных поверенных» // Собрание законодательства Российской Федерации от 5 января 2009 г. № 1 ст. 2.

⁶ Федеральный закон от 30 декабря 2008 г. «О патентных поверенных» // Собрание законодательства Российской Федерации от 5 января 2009 г. № 1 ст. 7.

etish asosi sifatida Qoplonovning arizasi rus tilida taqdim qilinganligi, Qoplonov O'zbekiston Respublikasi fuqarosi emasligi hamda nomzod oliy yuridik ma'lumotga ega emasligi sabab sifatida ko'rsatilishiga ham to'xtalib o'tamiz.

VMQ–238-sonli qarori asosida tasdiqlangan Nizomning 10-bandiga ko'ra, nomzod Agentlikga o'zini patent vakili sifatida attestatsiyadan o'tkazish to'g'risida ariza beradi. Arizaga:

- oliy ma'lumot to'g'risidagi diplom nusxasi;
- nomzodning intellektual mulk obyektni muhofaza qilish sohasida yoki intellektual mulk obyektlariga huquqlarni himoya qilish sohasida advokat sifatida zarur ish stajiga ega ekanini tasdiqlovchi hujjatlar (mehnat daftarchasi yoki individual mehnat shartnomasining nusxasi yoxud ishga qabul qilingani va bo'shatilgani haqida buyruqlardan ko'chirmalar va intellektual mulk obyektlariga huquqlarni himoya qilish bilan bog'liq nizolarda qatnashganlik to'g'risidagi hujjatlar);
- attestatsiyadan o'tkazish uchun belgilangan to'lov to'langanligi haqidagi hujjat;
- nomzodning istagiga ko'ra uning kasb bilimlari darajasini tavsiflovchi boshqa hujjatlar ilova qilinadi.

Shuningdek, arizaga malaka oshirish kurslarida o'qiganlik to'g'risida sertifikat nusxasi ham ilova qilinadi. Malaka oshirish kursi nima? Ushbu jarayon Adliya vazirligi huzuridagi Yuristlar malaka oshirish markazida o'talib, kursning yakuni bo'yicha sertifikat taqdim etiladi. Yuqoridagi muhokama qilganimizdek, malaka oshirish kurslariga bazaviy oliy ma'lumotidan qat'i nazar Toshkent davlat yuridik universitetida magistratura yo'nalishining "Intellektual mulk huquqi" ixtisosligi bo'yicha tahsil olgan nomzodlar borishi mumkin. Patent vakillarini qayta tayyorlash va malakasini oshirish Markaz va patent vakili o'rtasida tuziladigan shartnoma asosida to'lov hisobiga amalga oshiriladi.

Ariza davlat tilida yoki rus tilida taqdim etiladi. Arizaning belgilangan namunaviy shakllari O'zbekiston Respublikasi Adliya vazirining "Patent vakilligiga nomzodlarni attestatsiyadan va ro'yxatdan o'tkazish hamda patent vakillarini

attestatsiyadan o'tkazish qoidalarini tasdiqlash haqida" 2019-yil 13-dekabrda 538-mh-sonli buyrug'i 1–3-ilovalarida keltirilgan. Berilgan arizalar asosida patent vakillarini tanlash va malaka imtihonini o'tkazish, shuningdek, shikoyatlarni ko'rib chiqish vakolati Agentlik tomonidan malaka va apellatsiya komissiyalari tomonidan amalga oshiriladi.

Yuqoridagi Qoidalarining 5-bandi malaka komissiyalari vakolati doirasini belgilab bergan. Unga ko'ra, malaka komissiyalari:

- a) malaka imtihoni o'tkazish tartiblarini belgilaydi;
- b) imtihon topshiriqlarini tasdiqlaydi;
- v) imtihon oluvchilarni tayinlaydi va imtihonni tashkil etadi;
- g) nomzodning yoki patent vakilining malaka imtihoniga qo'yilishi to'g'risida qaror qabul qiladi;
- d) nomzodning yoki patent vakilining attestatsiyadan o'tishiga ruxsat berilishi yoxud attestatsiyadan o'tishi rad etilishi haqida qaror qabul qiladi.

Mazkur Qoidalar 24-bandida keltirilishicha, nomzod yoki patent vakili O'zbekiston Respublikasi fuqarosi bo'lmaganda yoxud Agentlik va uning tizimidagi tashkilotlar xodimi bo'lganda, shuningdek, mazkur Qoidalar 22-bandining "a" — "v" kichik bandlari va 23-bandda belgilangan hujjatlar mavjud bo'lmaganda attestatsiyadan o'tkazish rad etilishi mumkin. Boshqa asoslar bo'yicha rad etilishiga yo'l qo'yilmaydi.

Yuqoridagi holatda ko'rishimiz mumkinki, Qoplonovning arizasini rad etish uchun bir qancha asoslar keltirib o'tilgan. Mavjud normativ-huquqiy hujjatlar asosida ularning qaysilari asosli yoki asossizligini anqilashga harakat qilib ko'ramiz.

1. Birinchidan, murojaat rad etilgani haqidagi yozma bildirishnomaning 5-mart kuni jo'natilishiga e'tibor qaratsak. Adliya vazirining 538-mh-sonli buyrug'i bilan tasdiqlangan Qoidalarining 25-bandiga ko'ra, ariza va unga ilova qilingan hujjatlar qabul qilingan sanadan boshlab, **o'n ish kuni** mobaynida nomzod yoki patent vakiliga attestatsiyadan o'tishga ruxsat berilgani yoki attestatsiyadan o'tkazish rad etilgani haqida yozma ravishda bildirishnoma yo'llanishi lozimligi

belgilangan. Yuqoridagi holatda esa tegishli muassasa yozma bildirishnomani ushbu muddatni buzgan holda taqdim etganligi holatlardan ma'lum. Ikkinchidan, arizaning rus tilida keltirilganligini asos sifatida ko'rsatish belgilangan qoidalarga zid. Chunki yuqoridagi Qoidalar 21-bandida ariza davlat tilida yoki rus tilida taqdim etilishi mumkinligi mustahkamlangan. Ikkinchidan, Qoplonovning O'zbekiston Respublikasi fuqarosi emasligini asos qilib ko'rsatilishiga kelsak, o'sha Qoidalar 24-bandida nomzod yoki patent vakili O'zbekiston Respublikasi fuqarosi bo'lmaganda attestatsiyadan o'tkazish rad etilishi mumkin. Bundan kelib chiqadiki, mazkur asos qonunga zid emas. Chunki Qoplonov Qozog'iston Respublikasi fuqarosi hisoblanadi. Uchinchidan, uning oliy yuridik ma'lumotga ega emasligini sabab qilib ko'rsatish holati. Bu muammoli holatga nisbatan huquqiy yechimni o'sha Qoidalar 22-bandidan topishimiz mumkin. Unda arizaga ilova qilinadigan hujjatlar sifatida oliy ma'lumot to'g'risidagi diplom nusxasi keltirilganligini uchratamiz. Demak, oliy **yuridik** ma'lumot talab etish qoidasi yo'q. Ammo yuqoridagi Nizom 6²-bandida keltirilishicha, intellektual mulk sohasida mutaxassislarni, shu jumladan, patent vakillarini tayyorlash, ularning bazaviy oliy ma'lumotidan qat'i nazar Toshkent davlat yuridik universitetida magistratura yo'nalishining "Intellektual mulk huquqi" ixtisosligi bo'yicha amalga oshiriladi, deb belgilangan. Yuqoridagi holatni aniqlash uchun komissiya bazaviy oliy yuridik ma'lumotni nazarda tutyaptimi yoki magistrlik darajasinimi – bu masala mavhum. Ammo Qoplonovning na bazaviy, na "Intellektual mulk huquqi" bo'yicha magistrlik darajasi mavjud emasligini inobatga olsak, qarorni qonunga zid deya olmaymiz. Keyingi navbatda Qoplonovning keltirgan vajlarini muhokama qilsak. Ya'ni uning o'rta-maxsus yuridik ma'lumotga hamda Qozog'iston Respublikasida advokat yordamchisi sifatida besh yil ish stajiga ega ekanligi holatini. O'sha Qoidalar 24-bandida yuqorida aytib o'tganimizdek, nomzod yoki patent vakili O'zbekiston Respublikasi fuqarosi bo'lmaganda yoxud Agentlik va uning tizimidagi tashkilotlar xodimi bo'lganda, shuningdek, mazkur Qoidalar 22-bandining "a" — "v" kichik bandlari va 23-bandda belgilangan hujjatlar mavjud bo'lmaganda attestatsiyadan o'tkazish rad etilishi mumkin. Boshqa asoslar bo'yicha rad etilishiga yo'l qo'yilmaydi. Aslida Qoplonovning O'zbekiston

Respublikasi fuqarosi emasligining o'zi, arizani rad qilish uchun asos bo'lar edi. Ammo Qoplonovning keltirgan vajlari ham qonun hujjatlarida o'z ifodasini topmagan. Bulardan kelib chiqib, Qoplonovning murojaati qanoatlantirilmasligiga guvoh bo'lishimiz mumkin. Ammo bu uning qaror yuzasidan shikoyat qilish huquqini cheklab qo'ymaydi. Patent vakillari to'g'risidagi Nizomning 14-bandiga ko'ra, nomzod yoki patent vakili attestatsiyadan o'tkazishning, shu jumladan malaka imtihoniga qo'yishning rad etilgani yuzasidan u attestatsiyadan o'tkazish rad etilgani to'g'risidagi qarorni olgan sanadan boshlab 3 oy muddatda apellatsiya komissiyasiga shikoyat qilishi mumkin. Apellatsiya komissiyasi shikoyat bo'yicha u olingan sanadan boshlab bir oy muddatda qaror qabul qiladi.

Keltirilgan tahliliy fikrlar asosida quyidagilarni xulosa sifatida keltirishimiz mumkin:

Birinchidan, attestatsiyadan o'tkazish rad etilganligi to'g'risidagi yozma bildirishnoma O'zbekiston Respublikasi Adliya vazirining "Patent vakilligiga nomzodlarni attestatsiyadan va ro'yxatdan o'tkazish hamda patent vakillarini attestatsiyadan o'tkazish qoidalarini tasdiqlash haqida" 2019-yil 13-dekabrda 538-mh-sonli buyrug'i asosida tasdiqlangan Patent vakilligiga nomzodlarni attestatsiyadan va ro'yxatdan o'tkazish hamda patent vakillarini attestatsiyadan o'tkazish qoidalarining 25-bandiga ko'ra, 10 ish kuni mobaynida ma'lum qilinishi kerak.

Ikkinchidan, murojaatni rad qilish sifatida uning rus tilida keltirilganligini ko'rsatish Patent vakilligiga nomzodlarni attestatsiyadan va ro'yxatdan o'tkazish hamda patent vakillarini attestatsiyadan o'tkazish qoidalarining 21-bandiga zid. Chunki ariza davlat tilida yoki rus tilida berilishi mumkin.

Uchinchidan, patent vakilligiga nomzod Patent vakillari to'g'risidagi Nizom 4-bandi, Patent vakilligiga nomzodlarni attestatsiyadan va ro'yxatdan o'tkazish hamda patent vakillarini attestatsiyadan o'tkazish qoidalarining 22-band, "a" kichik bandiga ko'ra, oliy ma'lumotga ega bo'lishi kerak. Bundan tashqari intellektual mulk obyektni muhofaza qilish sohasida yoxud intellektual mulk

obyektlariga huquqlarni muhofaza qilish sohasida advokat sifatida kamida uch yil ish stajiga ega bo'lishi lozim. Shuningdek, o'sha Nizom 3-bandiga ko'ra, nomzod O'zbekiston Respublikasi hududida doimiy yashaydigan O'zbekiston Respublikasi fuqarosi bo'lishi shart. Bu talabning buzilishi yuqoridagi Qoidalarining 24-bandiga ko'ra murojaatni rad etishga asos bo'ladi.

**Toshkent shahar Shayxontohur
tumani ma'muriy sudiga**

Arizachi: Qoplonov Serikbay
Nurumbayevich

Manzil: Qozog'iston Respublikasi,
Turkiston viloyati,
Turon ko'chasi, 4-uy
Tel: +(998 97) 123-45-56

Javobgar: O'zbekiston Respublikasi
Adliya Vazirligi
huzuridagi Intellektual mulk agentligi

Manzil: Toshkent shahar, Shayxontohur
Tumani, Xadra mavzesi, 33
Tel: +(998 71) 232-50-42

Ariza

Men 2010-yilda Toshkent davlat iqtisodiyot universitetining Bank ishi fakeltetini tamomlaganman. 2020-yil 21-fevral kuni O'zbekiston Respublikasi Adliya vazirligi huzuridagi Intellektual mulk agentligiga patent vakili sifatida attestatsiya va ro'yxatdan o'tish uchun murojaat qildim. Lekin Agentlik mening murojaatimni rad etib, bu haqida 2020-yil 5-mart kuni menga yozma bildirishnoma yubordi. Agentlik o'zining yozma bildirishnomasida rad etish asosi sifatida arizam rus tilida taqdim qilinganligini, men O'zbekiston Respublikasi fuqarosi emasligimni hamda oliy yuridik ma'lumotga ega emasligimni sabab qilib ko'rsatgan.

Men Agentlikning ushbu yozma bildirishnomasidan noroziman. Chunki men o'rta-maxsus yuridik ma'lumotga ega bo'lib, Qozog'iston Respublikasida advokat yordamchisi sifatida besh yil ishlaganman.

Yuqoridagilarga ko'ra, O'zbekiston Respublikasi Ma'muriy sud ishlarini yuritish to'g'risidagi Kodeksning 26-27-moddalariga asosan,

SO'RAYMAN

O'zbekiston Respublikasi Adliya vazirligi huzuridagi Intellektual mulk agentligiga meni patent vakili sifatida attestatsiyadan va ro'yxatdan o'tkazish majburiyatini yuklatilishini.

Ilova:

1. Ariza nusxasi
2. Agentlikning yozma bilidirishnomasi
3. Davlat boji va pochta xarajatlari kvitansiyasi.

Arizachi

Qoplonov S.N.

Foydalanilgan adabiyotlar:

2. Институт патентного поверенного в Российской Федерации // Давудов Д., Маренич М. г. Волгоград. 2016. С.5.
3. O‘zbekiston Respublikasining yangi tahrirdagi “Ixtirolar, foydali modellar va sanoat namunalari to‘g‘risida” 2002-yil 29-avgustdagi 397-II-sonli Qonuni
4. Vazirlar Mahkamasining “Patent vakillari to‘g‘risidagi nizomni tasdiqlash haqida” 2003-yil 1-iyuldagi 298-sonli qarori asosida tasdiqlangan Patent vakillari to‘g‘risidagi Nizom
5. O‘zbekiston Respublikasi Adliya vazirining “Patent vakilligiga nomzodlarni attestatsiyadan va ro‘yxatdan o‘tkazish hamda patent vakillarini attestatsiyadan o‘tkazish qoidalarini tasdiqlash haqida” 2019-yil 13-dekabrdagi 538-mh-sonli buyrug‘i asosida tasdiqlangan Patent vakilligiga nomzodlarni attestatsiyadan va ro‘yxatdan o‘tkazish hamda patent vakillarini attestatsiyadan o‘tkazish qoidalari
6. Федеральный закон от 30 декабря 2008 г. «О патентных поверенных» // Собрание законодательства Российской Федерации от 5 января 2009 г. № 1 ст. 24.
7. “Legislation.govt.nz”. legislation.govt.nz. 2011-01-01. Retrieved 2012-01-15. Section 100 of the Patent act.
8. “The New Zealand Institute of Patent Attorneys, Inc”. nzipa.org.nz.
9. “Trans-Tasman Patent Attorney Regime”. TuckeripLaw.com. 2014-07-02. Retrieved 2014-07-02.